



Ex libris thesauri
Q. M. D. G. inia

Mia ui Ia nio

o o o o o

HIERONYMI
ARCONATI

è Soc. IESV

PROLUSIONES POSTHUMÆ

IN GRATIAM

A C A D E M I Æ

*Rhetorum Braydensium
editæ.*



MEDIOLANI,

Typis Iosephi Pandulphi Malatestæ. 1702.

*Superiorum permissu;
Et Privilegio.*



3

SPIRITUS FRANCISCUS
ROSIGNOLIUS

E SOCIETATE IESU,

*Præpositus Prouincialis Prouinciæ
Mediolanensis.*

CVM librum, cui titulus est *Pro-*
lusiones posthuma Hieronymi An-
conati è Soc. Iesu, aliquot eiusdem So-
cietatis Theologi, quibus commissum
fuit, recognouerint, & in lucem edi-
posse probauerint; facultate nobis à
Patre nostro Generali Thyrso Gon-
zalez communicatâ, concedimus, vt
typis mandetur, si ita ijs, ad quos
pertinet, videbitur. In quorum fidem
has literas manu nostrâ subscriptas,
& sigillo Societatis nostræ munitas
dedimus. Genuæ 16. Martij 1702.

Spiritus, Franciscus Rosignolius.

A 2

IM-

I M P R I M A T V R.

*Fr. Angelus Maria Battianus Sac. Th.
Magister, ac Vicarius Generalis San-
cti Officij. Mediol. &c.*

*Bartholomaeus Crassus Can. Ord. pro Emi-
nentiss. Card. Archiepiscopo.*

*Angelus Maria Maddius pro Excellen-
tiss. Senatu.*

R H E T O R V M
B R A Y D E N S I V M
A C A D E M I Æ .

HIERONYMI ARCONATI è Soc. IESU
adolescentis innocentissimi acerba
mors eos omnes , qui eius indo-
lem planè auream , & mores sua-
uissimos norant , improuiso ictu adeò percu-
lit , vt quicquid eidem fuerat religiosæ su-
pellectilis , id omne tum ab externis , tum
à nostris arreptum fuerit , quò iactura ex-
tincti iuuenis aliquatenus leniretur . Dan-
da igitur insuper fuerant eius amantissi-
mis discipulis ingenij , quæ supererant ,
monumenta ; prolusiones videlicet , quas
habuit , cùm grammaticam & humanio-
res literas apud nos doceret , quas pluri-
mi iteratis precibus postularunt . Has ita-
que habes , lector humanissime ; sed utcun-
que & venustate styli , & salibus , & poë-
ticis imaginibus eas commendandas cen-
sueris ; ij tamen , qui viuas quodammodò
ex ipsius ore exceperunt , vbi iterum vocem
dicentis , pronuntiandiq; gratiam sibi præ-
sentem restituerint , vbi animi illius in om-

nium animos illabentis memoriam excitauerint, longè venustiores profectò sentient, & nescio quâ præditas vitâ, quam cæteri fortasse non ita faciliè experiantur. Nihil iccirco ex ijs demptum fuit. Reticentias nonnullas, & vocabula scholarum interdum barbara, facietè in carmen deducta, periodum aliquam pendentem, constructione etiam studiosè impeditâ, nec non interdum versus ex hemistichijs Virgilij, cuius erat studiosissimus, datâ operâ concinnatos, atque alia huiusmodi omnino intacta reliquimus. Siquidem ista alumni ipsius auditoribus, eorumque amorì ac desiderio potissimùm damus; qui, siquid fortè ab alijs desideretur, oris & gestûs bene memores, actione ipsâ in mentem reuocatâ, faciliè supplebunt. Sed quota pars ista ingenij huius præclarissimi adolescentis? Nam, vt Philosophiæ, diuinarumque scientiarum studia omittam, erat ille in geometriâ apprime versatus, atque vtriusque analyticæ tum veteris, tum nouæ arcana ingressus, ad disciplinas mathematicas natus videbatur. Nihil erat adeò abstrusum, quod non sagacissimè inuestigaret; nihil tam vastum, ac dissipatum, quod non illico in suas partes digereret, atque

7
atque in vnum contraheret ; & quidem
tantâ facilitate , vt , veluti per otium , ar-
duis & difficillimis facultatibus animum
reficere videretur . Sed ista quoque exigua
& leuia , si cum ingenij dotibus integri-
tatem morum , Christianam animi demis-
sionem , pietatem , modestiam , mansuetu-
dinem , & quandam hilaritatem , natam
ex innocentia , comparemus . Itaque vitam
ab infantia vsque ad obitum innocentissi-
mè exactam in ipso ætatis flore mors oc-
cupauit ; mors tamen adeò læta , adeò
tranquilla , vt decumbenti ingruerit pla-
cidissimi instar somni . Nec potuit vllâ nu-
be serenam frontem infuscare , nec risum
illum , indicem pacis , post obitum quo-
que in labris relictum , ausa fuit , vt ita
dicam , lædere ; vt nihil planè funereum ,
nihil lugubre in eo cadauere cerneretur .
Quamobrem , quandiu expositum inter
nos fuit , hilaritate illâ adhuc superstitè ,
lacrymas omnium temperabat ; nec seriò
luctus visus est incipere , nisi post tumulum .

Vobis itaque , Rhetores humanissimi ,
institutoris vestri vocem quodammodò in
his paginis relictam , iterum audiendam
exhibemus . Vos ille incredibili amore ac
diligentiâ vniuersos literis & pietate for-

mabat, labore, etiam per autumnales ferias, nunquam fere intermisso; neque unquam loquentem audiui nisi de Deo, de rebus cœlestibus, de literis, & de studiis vestris, in quibus visus erat vnicè collocasse delicias suas. Scripta quoque ferè omnia ab eo relicta academias vestras continent, oratiunculas panegyricas, elogia, atque epigrammata honorifica in laudem vestram; nec non numerorum, architecturæ militaris, atque huiusmodi artium elementa vobis tradenda, veluti quædam oria humanioris literaturæ: vsq; adeò præstantissimum illud ingenium, nobis quodammodo ereptum, ad vos penitus transtulistis. Vos denique huius amantissimi institutoris bene conscij, lethalis morbi acerbissimo nuncio perculsi, quibus lacrymis, quibus precibus ac votis supplices ante altaria vitam efflagitastis! Quibus ille officijs deuinctus, paulò priùs quàm luctam cum morte aggrediretur, gratias vobis referri maximas, & vestris precibus commendari supremis fere vocibus exorauit. Quamobrem monumenta ista literaria, quæ iuris vestri sunt, vobis amantissimis, atque ipsi vicissim adhuc carissimis, exhibita ac dedicata æquo libentique animo excipite.

PRO-



P R O L U S I O

H A B I T A

IN MEDIÆ GRAMMATICÆ
CLASSE.

ANtequam, pro hâc, quæ mihi recens
atque insperatò obtigit, Gramma-
tices ex Superiore loco tradendæ Pro-
uinciâ, antequam, inquam, prima
facultatis huiusce rudimenta euoluere aggre-
diar, dabitis mihi hanc veniam, quotquot
huc conuenistis, Sapientissimi Patres, vt, tra-
ductâ iam nunc ad novos discipulos prolusio-
ne meâ, pauca quædam studijs, ac moribus
instituendis conducentia eos in præsentia com-
moneam. Quod sicui fortè parum opportu-
nè grauissimam hanc concionem aduocasse
videar, cùm mihi in animo sit Adolescentu-
los vnice alloqui; id à me eo etiam consilio
factum intelligat, vt nouo Præceptori apud
nouos discipulos dicere incipienti auctoritatis
aliquid hæc sapientum virorum coronæ con-
ciliet. Ne verò peruulgata iam, ac sæpius au-
dita recinendo, plus nimio quam par est, ve-

strâ in me audiendo humanitate abutar, satius duxi poeticè atque allegoricè, vt minùs molestæ auribus accidant, res cæteroquin notissimas conuestire. Allegoriam porrò è re nauticâ petam. Nimiùm enim multa sunt, in quibus literarij ac maritimi cursus eadem prorsus est ratio. Quamobrem sub allegoricis ventorum, procellarum, atque id genus nominibus, ea, de quibus discipulos iam nunc præmonitos velim, complectar. Adeste igitur animis, Adolescentes. Quotquot ad hanc palæstram hodie literis operam daturi accessistis, instructam nauim conscendisse vos credite, in quâ ad sapientiæ portum contendatis. Vestris in libris hydrographicas tabulas, in hisce scamnis transtra, si placet, agnoscite. Bellicum hoc vexillum non adeò lacerum, ac difsutum est, vt puppi præfigi non possit. Eia agite, quod vobis bene ac feliciter vertat, funem præcidite, vela tendite, remis incumbite. Sed antequam in immensum hoc difficultatum pelagus progrediamini, ipse interim, sumptâ Nauarchi emeriti iam, ac rude donati personâ, ea, quæ in totâ hâc nauigatione vel seruanda, vel vitanda sunt, præmonebo. Vos quæ hîc de nauticis rebus audietis, de literarijs studijs dici intelligite.

Sistite. Quis præceps iubet ardor carbasa vêtis Tradere, & ignotos remis propellere fluctus? Sistite; parua mora est. Defunctû mille periclis, Expertumque viæ, luènes, audite Magistrum. Mox maris edocti insidias, scopulosque latentes

ibi.

Ibitis, & tuti vastum sulcabitis aquor.

*Principiò Cælum, Cæloque errantia latè
Sydera sollicitum iubeo prædiscere Nautam,
Pleïades, pluuiasque hyadas, geminosq; Triones,
Arcturum, & crebris metuendū Orion a nimbis.
Nulli adedò obseruanda graui sunt sydera curâ,
Quàm quibus ignotas pelago perquirere terras
Fert animus, dubijsq; ratem committere ventis.
Ergo, priùs tumidū remis quàm scindimus æquor,
Nomine quamque suo, & certo dignoscere vultu
Cura sit, & proprios stellarum discere motus.*

*Qui Cælo vigilēs oculos, animumque retendit,
Non illum aduerso veniens Aquilone procella
Occupat, ignarumque viâ, & nil tale timentem.
Namq; ubi ab Eolijs Boreas erumpere claustris
Cogitet, & magno pelagus miscere tumultu,
Cynthia sanguineo vultum suffusa rubore,
Astraq; per nebulas tremulam vibrantia lucem
Signa priùs manifesta dabunt, queis rite notatis,
Instanti poteris puppim subducere nimbo.*

*Præcipuè stella est toto spectabilis axe
Celsior assurgens prope tardi plaustra Bootæ.
Illa regit dubios omni in discrimine Nautas;
Illa docet quando remis impellere marmor
Conueniat, quando in portum deducere classes;
Tendere quò cursum velis, quo flectere proram.
Hæc nunquam impuris pelagi se proluit undis:
Hanc Græci, hanc Latij seruât de puppe Magistri.*

Et licet indigni narretur fabula facti,
 Hanc Iouis imperio positam super astra puellam
 Amisâ pretium pro virginitate tulisse;
 Ne vos vera tamen deliria credite vatum.
 Namq; hæc diuinæ nunc sacra est stella Parenti,
 Quæ Cæli conuexa super mortalibus agris
 Optata affulget certæ Cynosura salutis.
 Sit vobis Dux illa viæ: namque, auspice tanto
 Sydere, nequidquam, magnum tollentibus austis
 Ionium, sæuæ bacchabitur ira procellæ:
 Hoc primû, hoc repetès iterûq;, iterûq; monebo:
 Quisquis inoffensis vada scindere salsa carinis
 Expetis, & dulci tandem consistere portu,
 Parthenidem assiduis supplex venerabere votis,
 Parthenidem cæloque simul pelagoq; potentem.

Præsertim dubiû nubes quando horrida solem
 Condit, & incipiunt agitata tumescere ventis
 Equora; tum meritis cumulare altaria donis
 Præstiterit, positaq; humi, è procumbere ad aras.
 Sæpe etiam medijs demerso profuit undis
 Te prece, te lacrymis, bona Virgo, in vota vocasse.
 Vidi equidem, qui nunquâ ausus se credere pôro,
 Ni prius ante aras, diuinæque ora Parentis
 Implorasset opem, facilesque in carbasia ventos.
 Multum ad cõratibus profunt hæc vota, neq; illû
 Parthenis ex alto nequidquam spectat olympo.
 Nec minùs interea mihi non laudatus abibis,
 Florea qui solitus Diuæ contexere ferta.

Cingis odoratis sublimia tempora donis.
 His ego felices quæcunque ad litora cursus
 Polliceor, pelagi obsequiũ, zephyrosq; fauentes.

Nec seruare tamen stellas prohibebo minores;
 Præcipuè clarum quæ traxit nomen ab igne,
 Quæ Graijs Pyros, Ausonijs Ignatius audit.
 Ille tibi, siquando vapor se tollat ad auras
 Improbis, & placidũ Cynosuræ sydus inumbret;
 Ille tibi monstrabit iter, cursumque docebit;
 Disiectã donec rursus se nube, recludat
 Sydus hyperboreum, primaque in luce coruscet.

Nõ minor est vëtis cura impèdenda, neq; illos
 Ignorare impune licet. Nam, carcere rupto,
 Sæpe ruit Boreas, pelagoque incumbit aperto.
 Ille procelloso tumidus præcordia fastu
 Ocyus auulsas humili de litore puppes
 Disijciet procul, & magno propellet in altum
 Impete, prærupto vallans circum undique ponto.
 Tum verò immanes undarum ad litora montes
 Flamine torquet agēs, volitatq; pæquora victor:
 Et modò iactat am sustollit ad astra carinam,
 Et modò, deductis in tartara deprimit undis.
 Heu ventis ne tu nimium confide secundis,
 Neu te præcipitem ventosa superbia fallat.
 Ah quoties vano nimium dum turgida fastu
 Vela animique tument, maioraq; viribus audent,
 Ah quoties tenui nocuit tumor ille carinæ!
 Et quamuis magnam, Boreã impellente, videris

*Confecisse viam, pelagoque volasse patenti,
 Nunquā ego cæca tamen cursûs cōpendia, nūquā
 Laudarim, tantis quādo hæc sunt empta periclis.
 Quin, age, nauigys tunc cū violentior aura
 Incidit, id metuens, humilem lege litoris oram;
 Altum alijs teneant; tu prudens contrahere vela.
 Ni facis, & Boream mauis audire vocantem,
 Heu miser in quales pelagi te proijcis iras!
 Nunc volat, excusso tua cymba soluta timore;
 Mox erit hoc ipsum exitio, tumidisq; sub undis
 Naufraga mergetur, felici naufraga vento.
 Tunc vasto frustra cernes de gurgite portum,
 Seraque per surdas iactabis vota procellas.*

*Nec tu litoribus fidis, me consule, proram
 Solueris, horrificis cū videris eminus alis
 Agglomerare Notum tetras caligine nubes.
 Ille imbres, densamq; polo rapit humidus auram,
 Et trepidos nigro contristat turbine nautas.
 Continuo ex oculis tenebrosa volumina solem
 Eripiunt, mæstamque cient super æquora noctem.
 Inde tibi tristes pelagus denunciat iras,
 Et fremit, & nigris ferale immurmurat undis.
 Heu malè tum poteris recto producere cursu
 Puppis iter; manibus nam tunc horrore remissis
 Arma cadunt, tetraque iacens sub nube Magister
 Immemor astrorum cælo diffidit & arti.
 Hac tu tristitia teterrima flamina longè
 Effugito. Tristes si cingunt æthera nimbi,*

Non

Non tibi tunc prudens quisquā persuadeat auctor
Ut tali speres portum contingere Cælo.

Scilicet, ut facili procedant carbasa cursu,

In primis hilares animos, cælique requiri

Latitiam pelago experti docuere Magistri.

Nam tacitis mæror rodens præcordia curis

Submittitque animos, & inertia corpora vincit.

Hinc artus torpore graui constricta repente

Nautica consuetos non explet turba labores:

Multa gemit, cæptoque velit desistere cursu.

Sed neq; quā multæ species, & quanta nocendi

Nomina sint stygio laxatis carcere ventis

Edocuisse vacat. Nunc, quæ mage noxia Nautis

Flamina, sollicitum memori te condere mente

Sufficiat, tristemq; Notum, Boreamq; tumentem.

Sit Zephyrus lenis, qui te comitetur euntem:

Tuta magis, quo lenta magis, per cærula puppis

Ibit, & optatos intrabit denique portus.

At non ventorum rabies totumque profundo

Excitum pelagus mage torqueat anxia curis

Pectora, quàm placidi fallax pellacia ponti.

Væ tibi, si ventis quacunque silentibus, altum

Tranquillis Neptunus aquis distenderit æquor:

Duroque argento, solidoque simillima vitro

Litoribus placidè acclinis latè vnda quiescat.

Tum medio immotam sistunt maris otia pinum

Æquore; tum nullo finuantur carbasa flatu.

Deiectæ cecidere manus, lentusque per artus

Sudor

*Sudor igitur piget assiduus insistere remis.
 Nec longum in medio tempus, cum protinus omnes
 Enerues pereunt ignauo in corpore vires:
 Et quæ sufficeret multos annona per annos
 Temporis exigui cursu consumpta recessit.
 Otia sæpe nocent plus quam nocuere procellæ:
 Et quos non Boreas, non terruit Auster euntes,
 Segnities deuincit iners, cursusque secundos
 Abrumpit, magnis obsistens inuida cæptis.
 Noui ego, præproperæ qui captus amore quietis,
 Cum summâ latus iam iam de puppe propinquos
 Cerneret, optatosque diu se attollere portus,
 Restitit, & fessâ confidit in aquore naui.
 At non huic portus, non expectanda corona est,
 Quem sic exigui facies inopina laboris
 Territat, & cæpto remouent mala tædia cursu.
 Nil probo si præcox præuertat tempore votum,
 Atque immaturam cupiat iam Nauta quietem,
 Cum dubijs incertus adhuc iactatur in undis.
 Scilicet & tempus veniet, quo blanda licebit
 Otia, & exacti pretium cæpisse laboris:
 Nunc animis opus, o luuenes, nunc pectore firmo;
 Nunc clauum torquere iuuat, nunc tendere vela;
 Nunc versi in lento lucentur marmore remi.
 Postquæ autem tumidas ventorum eluserit iras
 Puppis, & immoti superauerit otia ponti;
 Mox miseros grauiora manet discrimina Nautas.
 Assurgit pelago in medio pulcherrima visu*

*Insula, quam molles distinguunt undique flores.
 Delicijs, luxuque vacat. Pars acrior anni
 Exulat; assiduo latantur gramina vere.
 Hanc circum Sirenes agunt informia monstra;
 Quarum subiectis quæ pars supereminet undis,
 Ora, manusque ambæ, collisæque pectora fluctu.
 Fœmineam pulcrâ referunt sub imagine formam.
 At postrema latens pelago pars corporis atrum
 Desinit in piscem, squamisque rigentibus horret:
 Pontum pone legit sinuosa volumine cauda.
 Illæ, cum primum puppes sensere propinquas,
 Illicet arguto fundunt hos gutture cantus,
 Queis ultrò fessosque viæ, cupidosque quietis
 Ad blanda alliciant incautos litora Nautas.*

*O Iuenum manus immensis defuncta periclis,
 Huc superum studio delati, huc vertite proras.
 Hic gemmis violisque comas præcincta voluptas
 Nectareos dextrâ latices venientibus offert:
 Hic pariter nullo constricta licentia nodo,
 Gaudiaque, & faciles posuere cubilia risus.
 Quin & libratis volitans per inania pennis,
 Auratisq; nitens pharetris gens mollis Amorû
 Felices læto peragant modulamine terras,
 Hospitibusque novâ mulcent dulcedine sensus.
 Quid tenerum annorum finitis marcescere florem
 Oppressum cu is? Non hoc sibi talia tempus
 Postulat. Adueniet tristi comitata senectus
 Agmine morborum. Tunc vestram seria mentem*

Cu:

*Curarū tunc turba premat. Nunc prospera quādo
His fortuna rates felicibus appulit oris;
Hīc vobis hīc parata quies. Subducite puppes,
Nec venienti ultro praecludite pectora forti.*

*Tali Sirenum resonabunt agmina tantū.
At non vos faciles præbete canentibus aures:
Vertite vela citi, ventosque rogate secundos.
Ante & nauifragis præstat concurrere saxis,
Et cæcam Libycis impingere syrtibus alnum,
Quām semel infidas Sirenum inuisere terras.
Namque ubi vesano blanda telluris amore
Egressi aprico sternuntur litore Nautæ,
Heu miseri! obscænis pereūt data pabula mōstris.*

*Tum verò postquam insidias euaserit omnes
Vestraratis, tuto excipiet Sapiencia portu,
Anchoraque optatas felix mordebit arenas.
Nunc moniti, nūc ite, alacresq; incūbite remis.*





PROLUSIO

DE POENA PVERILI

IN SUPREMA

GRAMMATICÆ CLASSE

HABITA.

TAndem aliquando , quod votis omnibus iamdiu expetiueram , tempus illud aduenit , quo intermissam per autumnales ferias , docendi prouinciam repetere liceat . Proinde dabitis mihi hanc veniam , humanissimi PP. , vt antequam prælectioni exordium ponam , gratuler mihi quodammodo sortem meam , & diuturnam ab hisce lyceis absentiam , hodiernæ celebritatis cogitatione consoler . Iuuat enim circumfusam hanc mihi adolescentum coronam intueri . Iuuat ex eâ alacritate quam ipso ore atque oculis præferunt , certam futuræ solertiæ spem percipere . Hac ego tam propensâ animi voluntate ad exercitationes nostras reuertens , benemeritum me de sapientiâ existimaram . At quàm disparem illa mihi gratiam refert ? Vix ad eius vexilla redeo , & iam literarium vectigal , nisi sponte persoluerim , ex-

exprimet ab inuito. Præfari volentem iubet, non antea me ex hoc loco dimissura quàm imposito oneri satisfecerim. Rem planè difficilem, si clam exigat, longè verò difficillimam, si palàm. Quòd si apud adolescentulos tantùm meos dicerem, occurrerent plurima quæ eos in præsentia præmonitos vellem. Vos verò, Sapientissimi PP. quid à me hodie vestrâ dignum sapientiâ expectetis? Nihil. Quid itaque? Puerilia audietis. Nempe? Nempe de pœnâ puerili. De pœnâ puerili? Ita planè. Quid hoc argumenti? Scilicet melius nihil suppetit: Scilicet ita lubitum est. An ab omnibus dicendi causam exquiritis? Atque vos, pueri, frontem ne contrahite. Iniquus vobis, ferox non euasi. Hoc vnum aio, pueriliter vos, cùm pueri sitis, puniendos esse.

Necessarias quidem puerili institutioni pœnas esse aliquas, nemo, qui rem paulò attentius introspectiat, in dubium vocauerit. Doloze quippe, & voluptate aguntur præ cæteris pueri, eorumque gratiâ ferme omnia faciunt, nempe ut ne doleant, sed ut latentur. Cætera, quæ ad literarum amorem sapientum animos impellunt, incitamenta, frustra pueris proponas, nisi eos, vel munusculis allicias, vel pœnis excites. Vtrisque proinde vtendum opportunè. Sæpius tamen fit, ut quod ab adolescente præmij spes non impetrat, id pœnæ metus extorqueat. Ita enim naturâ comparatum videmus, ut hominum animos, nedum puerorum, nulla res magis, quàm metus, in officio contineat.

Iam

Iam verò, cùm plurima sint punitionum genera ; verbera , dedecora , obiurgationes , minæ ; quænam potissimùm seligenda , quænam vitanda , non faciliè dixerim . Quintilianus , optimus ille dicendi æquè ac docendi magister , cædi discentes , quanquam receptum in scholis morem fateatur , minimè vellet ; primùm , inquit , quia id deforme ac feruile est ; deinde , sicui tam est mens illiberalis , vt obiurgatione non corrigatur , is etiam ad plagas , vt pessima quæque mancipia , durabitur . Postremò , ne opus quidem erit hâc castigatione , si assiduus studiorum exactor adstiterit : Sæpe enim sic præceptoris negligentiam emendari videmus , vt pueri , non facere quæ recta sunt cogantur , sed quòd non fecerint , puniantur . Hæc Quintilianus , qui acerrimè hunc morem cædendi pueros oppugnans , tristes ferulas sceptrâ pædagogorum , vt ait Martialis , illis conatus est extorquere de manibus . Irrito tamen conatu . Huic enim in speciem graui , prudentique ratiocinationi , omnium gentium consuetudo reclamât . Magister siquidem pueritiæ vnus dolor est , cùm ratio esse nequeat .

Sic , ubi nolentem saltu exercere catellum

Ludius aggreditur , frustra poppysmate mulcet :

Elatâ insistit virgâ , digitoque minaci .

Sæpe ungues cedit , tremulo si corpore cedat ,

Cunctantesq; pedes ponat . Tandem ille monentis

Imperium sequitur dextræ , ramoque docente ,

Inuitâ discit naturâ , incedere rectus .

Tunc frustum exesa cereris , tunc præmia speræ

Ca-

Catelli, vos etiam, parcite, estis pueri, vos etiam scuticâ edocendi. Quare neque prorsus hoc pœnarum genus de medio tollendum, censeo, neque tamen sine modo, ac mensurâ adhibendum. Nam si nimia huiusmodi seueritas sit, pueris, quemadmodum teneris stirpibus, nimia siccitas nocebit, non proderit. Adde quod si verberibus quis obdurescat, quonam deinceps stimulo excitetur? Moderatè itaque, ac nonnisi iustis de causis ferulâ vtendum. Vtendum tamen, si res exigat. Si quid leuius peccarit puer, vel dissimulare malim, vel blandè emendare. Obiurgationibus certè, si eas non irato animo effundas, sed aliquâ potiùs laudatione permisceas, plus profectum iri apud adolescentes putarem, quàm si aut assiduïs verberibus, aut turpi aliquâ ignominia notâ affectos dimittas. Dedecora quippe, non seus ac verbera, si modum excedant, ingenuos animos, seruiles infractosque efficiunt. Quid enim excelsi molitur exhibilatus adolescens? Si magnanimæ indolis ille sit, tam turpiter secum agi nunquam ferat, & ignominia pernicax fiat, qui gloriæ stimulis erigeretur. Si duro ingenio, si humili forte sit, dedecus haud sentiat, & ingenuitæ sordes placeant. Voce alij & minis pueros dissipant. Verùm aures tantùm vellicat sonus ille, coriùm non cædit. Ad ingenium redibit quisque, vbi vim verbis deesse sentiet. Vt rem breui expediam, vno verbo proponam quid vnîuersè de hâc puniendi ratione sentiendum putem. Ego enim sic statuo,

tuo,

tuo, eam opportunissimam ad pueriles animos continendos pœnam fore, cui & minimum doloris, & plurimum terroris insit. Hoc ut confirmem, satis & mihi, & vobis fecisse credam si hanc pueros plectendi rationem Sapientissimi, ac Sanctissimi viri auctoritate comprobatam ostendero. Hic à me vestrum nonnulli. Dium Ignatium societatis nostræ parentem in exemplum adduci, ut video, expectatis. Ita planè adducam. Quomodo is puerilem culpam puerili tericulo aliquando punierit, nostis quidem, sed tamen lubeat adhuc semel ex me audire. Et sanè

*Quàm non parua fuit paruo sapientia facta,
Cum puerum subitâ permotum Ignatius irâ
Edocuit rabidæ franos imponere lingua!*

*Fortè hilares inter ludos exorta repente
Rixa inflammarat geminos in vana sodales
Iurgia; iamque acres animis discordibus iræ
Exarsere, minas, conuiciaque insuper addunt.
Tum puer, accensos cui pectoris acrior astus
Intus agit rabies, mentemque ferocius urget;
Vocem animisque tumens, elatoque ore sodalem
Increpitans, oneransque probris, risuque superbo
Despiciens, nimias amens processit in iras.
Namq; truci infandâ rumpens de pectore vocem:
At tibi cancer, ait, nares, mala bellua cancer
Exedat, & lentis populetur morsibus ora.*

*Verba ex incauto dilapsa Ignatius ore
Audijt, & culpa pœnam non absore passus,*

In

*Ingentem cancrum , nigranti corpore , longas
lactantem chelas , & lumine torua tuentem
Arripit . Hunc facili sed postquam linea nodo
Tania deuinxit , secretâ in parte reponit .*

*Tum puerû vocat , & patriâ compositus ad iram :
Tune , inquit , socius socio nil tale merenti ,
Improbe , saue puer , potuisti immittere cancrum ?
Quis te adeò immites effundere pectore diras
Edocuit ? tantane animis puerilibus iræ ?
Nescis , ab demens , nescis , quàm triste periculum ,
Quàm ferale malum , quæ sis portenta precatus :
Experire prior . 'Dixit , nec plura locutus ,
Eduxit tremulo pendentem flamine cancrum .*

*Vt vidit puer horrendi nigra brachia monstri ,
Et ferrugineo cataphractum cortice tergum ,
Et plexam lamnis caudam , flietque sonantem ,
Ilicet exangui trepidans expalluit ore ,
Arrectæque horrore comæ . Tum lumina torsit
Respiciens hinc inde , fugæ via siqua pateret .
Verùm ubi cuncta suo cernit præclusa timori
Effugia , heu miser , in lacrymas effusus inanes
Impleuit querulis omnem clamoribus ædem .
Ah , pater , aiebat , pater , ah ! non tale putavi
Tale malum . Parce insonci , miserere precantis ;
Neu miserum durus laniandum dente voraci
Horribili committe feræ . Semel ah , pater , oro ,
Tantum parce semel . Si detestabile posthac
Exciderit verbum , meritas non abnuo pœnas .
Talia*

*Talia perstabat lacrymans, genibusque volutus
 Ore dabat sine fine preces, sine fine querelas.
 Sed non idcirco lacrymis Ignatius ullis
 Flebitur, & vultu simulans quā nō habet iram:
 Iam non, saue puer, non evitabilis ista
 Est tibi pernicies, inquit; sensimque propinquans
 Attonito, & diuos nequicquam in vota vocanti
 Inijcit appensum per colla trementia Cancrum.*

*At miser, ut gremio impostā per pectora pestē
 Perreptare videt, nigrasque assurgere chelas,
 Clamorem immensum tollit, totisque tremiscit
 Artubus, & partes amens se versat in omnes.
 Nam quid agat? Retrahat sese? Sed pensile sēper
 Exitium sequitur fugientem, & cominus urget.
 Haerentem tentet diuellere vestibus hostem?
 Non ea vis animo, nec tantum in pectore robur,
 Audeat ut fatale manu contingere monstrum.
 Ergo interruptis singultibus ilia quassans
 Quas nō tūc lacrymas, quas nō dedit ore querelas?
 Heu! veniam superos, veniam te, care, rogabat,
 Ignati. Heu pereco! iam iam mala bellua fauces
 Exerit. Inceptas rumpunt suspiria voces.
 Non tamen ingentes passus procedere curas
 Ulteriùs pater, afflictis spes unica rebus.
 Namque ubi visa satis par culpæ ludicra pœna,
 Omnia spondentē, superosq; hominesq; precantē,
 Egregiè edoctum dirā formidine soluit.
 I nunc, & misero caneros immitte sodali.*

A

Huius

Huiusmodi igitur puerilem pœnam esse decet. Terreat illa, non lædat; excutiat, non abijciat; mederi possit, non interimere; specie magis, quàm re torqueat. Atque ut ad vos quoque orationem conuertam, Adolefcentes; nouas, acres, acerbis excogitavi pœnas, quas ipse quidem solus rideam; Vestrum nemo, me coram, irrideat. Noua etiam honoris monimenta, nouos magistratus, nouos gradus propono. Accipite. Celeberrimum illud, ac rancidum Capitolium aboleo penitus. Capitulos omnes exauctoro, dimitto. Areopagum. O nomen! O rem! Areopagum. Audistis? Areopagum, Atheniensis Areopago, si superis placeat, augustiorem, iam nunc condo, erigo, instituo. Aureos illic caractères, amplissimum affixum diadema breui spectabitis, ubi frequentior reipublicæ huius senatus adstiterit. Areopagita quisquis dici velit, venerando hoc dignum agnomine se præstet. Leges per otium feram. Vobis verò, ignauissima capita, vobis ego locum designaui. Latomias; Latomias, inquam, illo in angulo vestras parabo. Illis in Latomijs, quo malleo, quo scalp pro tundendi sitis; quid mali vobis Latomiæ portendant, scire velit nemo, aut, ubi velit, fari ipse nolim.





AMOR LABORIS.
DECLAMATIO
IN DESIDIOSOS
ADOLESCENTES
DICTA

*In eadem suprema Gramma-
tica classe.*

STamus promissis. Fidem meam iamdu-
dum sponsione obligatam, consilium
est in præsentì exsoluere. Meministis
enim, Humanissimi P.P., quo die pau-
ca quædam, ut meus est mos, apud vos de
puerili pœna ex hoc loco differui, me iam-
tum auditoribus meis, si strenuè rem litera-
riam gessissent, amplissimos honores; sin de-
sides, pigri, inertes forent, nouas, acres, acer-
bas pœnas denunciaſſe. Arcopagum Athenis
vsque in has horas aduectum, laborum metam;
Latomias verò inertix supplicium designaue-
ram. De Arcopago actum est. Dolenter dico.

Actum est. Neque id mihi verti velim culpæ. Qui vnus altissimum dignitatis fastigium proximè attigerat, importuno distinetur morbo. Cæteri longo nimium distant interuallo. Itaque, remenso iterum pelago, Areopagus enauigauit in Græciam, anno fortassis proximo, si superi annuent, non tamen antea, huc reuersurus. Fuit olim, Patres, fuit tempus illud, cùm hæc præclara virtutis decora ad laboris amorem satis apta incitamenta iure credideram. Nunc temporis, mirum quantum versa res sit. Mirum quantum inertix, desidixque in hâc palæstra licuerit. Relanguit discendi industria; restinctus est ille ardor animorum, cui summa quæq; pollicebar. Restat itaque, vt, quod alterum me facturum decreueram, de nouis in dies excogitandis pœnis, quibus vnice desidiosii adolescentes ad officium reuocari queunt, id in præsens præstem. Nouum itaq; idq; acerbissimum supplicium, profectò isti mihi hodie persoluent. Coëgi nempe vos huc, Humaniss. P. P., vt istorum inueteratæ incuriæ socordixque remedium vltimum, vtinam profuturum, seriam videlicet increpationem vestro in conspectu adhiberem. Aut enim (quod tamen vix speres) tacito oculorum vestrorum conuicio excitati resipiscant; aut saltem coram grauissimo Senatu inustam inertix notam ægrius in posterum terent.

Quanto hucusque labore insudauerim ingenijs quorundam subigendis, ac dedolandis, partim minis, partim promissis, monendo, hortando, castigando; quàm impigrè, quàm gna-

uiter

uiter strenuèq; in id dies noctesq; incubuerim, nemo vestrûm sibi facilitè persuadeat. Hinc tamen æstimare vtcunque licebit. Solent enim Grammaticæ facultatis institutores, austeri licet quammaximè atque assidui, interdum animi gratiâ aut progymnasmate aliquo, aut solemni puerorum concertatione, interdum etiam scenâ in publicum productâ ferari aliquantulum, & iugis assidue magisterij tædium subleuare. Ac ego improbissimum hunc docendi laborem pertinaci adeò, obfirmatoque animo arripui, vt nunquam, testor vos quotquot adestis Patres, nunquam hoc anno hisce animi, ingenijque delicijs indulserim. Atqui nemo nescit, quantum instaurandis viribus, & leuandæ molestiæ, ista conducant. Certè artifices, etiam infimi, non semper idem vrgent opus. Sed & faber, vbi malleo ferrum domuit, inani interdum ictu ferit incudem, & fessus arator incumbit stiuæ: Piscatores quoque, subductis nassis & retibus in siccum, maritimas oras ad vespertinas auras legunt. Unus ego, cui laboris amor commendatissimus in primis & fuit, & esse debuit, nunquam ab hâc trusatili molâ, dictandi, explicandi, corrigendique ne latum quidem vnguem discessi: Huius lapidifecæ ferræ manubrio perpetuò inhæsi: Ab huius plaustrî temone nunquam par illud boum laboriosissimum, patientiam videlicet, atque industriam abduxi. Nihil de genere ipso laboris dico. Saltem nauta, vt semel vela explicuit, & ratem soluit, oscitet licet ac dormiat in multam diem, illam, nemine cogente, iugi

cursu Aquilones ferunt . Molitor , vbi rotam
 expedit, illa dies noctesque vertitur . Vtinam
 simile aliquod mihi contingeret . Vtinam & mei
 discipuli , ceu rotata horologia , elaterium ali-
 quod in vertice aut occipitio gererent , quod se-
 ro vespere clauiculâ circumductum horis conti-
 nuò bis senis , manum ad scribendum , linguam
 ad recitandum , cæterasque facultates ad mu-
 nus suum compelleret . Itaque mihi perpe-
 tuò exercenda vox , dirumpenda ilia , adhi-
 bendi tertio quoq; passu stimuli : vrgendum :
 instandum . Ni faciam , illico redintegratur
 somnus , reditur ad ingenium , segnitie , osce-
 dine , torpedine victus iterum ac fatiscens pro-
 cumbit humi bos . Hæc paulò asperius à me di-
 cta sunt , Adolescentes , vt monstri huius teterri-
 mi , quod desidiam vocant , odium horroremque
 incutiam . Cuius vt imago altius animo inhæ-
 reat , propono vobis belluam in Americâ à Lusit-
 anis repertam , cui ab re ipsa , indoleque nomen
 Pigritiæ indiderunt . Descriptiunculam , quam
 carmine effundere mens fuerat , è calamo pro-
 dire volentem retinui . Onus illud longè mole-
 stius suscepi eandem ex integro , atque , vt aiunt ,
 de verbo , ad verbum ex historico transcribendi .
 Itaque audite . Valde inusitatâ & effigie , & na-
 turâ est Animal , Cerigonum ferè magnitudinæ ,
 sed rostro scædiore ad aspectum , & vnguibus ad
 digitorum similitudinem prominentibus . Huic
 ex occipitio existens coma ceruicem velat :
 Lento ventris adipe verrit humum , neque
 vnquam in pedes exsurgit . Denique tam
 tardè mouetur , vt quindecim ipsis diebus ad
 lapi-

lapidis iactum continuo tractu vix prodeat. Victitat arborum folijs, & in earum cacuminibus degit plerunque, quarum in ascensu biduum circiter, tantundem in descensu ponit. Neq; verò adhortationibus tantum aut minis, sed ne plagis quidem fustibusque bestiam, vel tantillum de insitâ ignaviâ, ac tarditate dimoveas. Hæc ille. Quis verò in hæc ignavissimâ belluâ nonnullorum ad viuum adumbrata ingenia non videat? Vos enim verò sceleratissimum monstrum vniuerso corporis, ac animi habitu refertis; vos, inquam, quos singulos digito possem innuere: eos scilicet, quibus in excitandis, cum assiduis institerim minis, vix obtinui, vt ab inferiori Palæstra, quæ ad lapidis iactum certè hinc non distat, in hanc vsque superiorem, biennio integro ægrè admodum reptando assurgerent. Obtinui tamen. Nunc verò longè deteriori sumus conditione. Mahum altiùs insedit, radicesque egit. Quamobrem vrgeam modò licèt quantum velim, plagasetiam, & fustes, si factò opus sit, lateri impingam, tundam itidem, & contundam, ecquid emolumenti sperem? Id vnum scilicet, vt ingenio suo tardos, artificio meo reddam tardiores. Quo fit, vt vix à risu temperare mihi possim, si qui (quod sæpe contingit) faustum mihi insequenti anno ad amœniores Parnassi colles, iter auspicantur. Per iocum, vt puto, ista dicuntur. Cæterum præclare ego mecum agi credam, si, post iustam alterius biennij moram in hæc eadem classe, ad Humaniores literas, ad excelsa, videlicet

delicet Heliconis iuga, pigerrima quædam capita, vrgendo, incitando, cogendo, totis demum connixus viribus tandem compellam. Hæc si æquis accipitis auribus, adolescentes, si probra cutem non vellicant; si vos vitij huius, obscuritas, tristitia, pædor, & squalor minimè terret; at terreant supplicia. Dantes Aligherius vniuersam Strygem, duce Virgilio, scrutatus, in primo inferni ambitu, ignauos ac desides vidit. Genus pœnæ æquissimæ ex ipso audite.

*Questi Sciaurati, che mai non fur viui,
Erano ignudi, e tormentati molto*

Da Mosconi, e da Vespe, che eran iui.

Verùm, vt dicam quod sentio, hæc eadem pœna pigros adhuc viuentes exercet. Quid enim aliud, quàm molestissimos aculeos dixeris quotidiana illa probra, quibus assiduè stimulantur? Surge, age, desidiose, glutinose, viscofe. Excute te. Veternum discute. Scribe aliquid. Libera aliquando animum istum, resinâ & pice inuolutum. Spinam dorsi humerosque Palladi voue, quos illa aliquando incuruet, & prominenti illo literatorum monimento insigniat. Hæc & sexcenta huiusmodi domi, foris, seriò, per iocum, semel, iterum iterumque, velis, nolis, in aures obtrudunt. Fas omnibus, vt cuique obuius fueris, in bonum reipublicæ te excitare, succutere, laceffere, castigare. Modò ad formicam industre animal consultum mitteris, modò ad apum aluearia. Hic tibi in limacum republicâ præfecturam, hic in testudinum conuentu

pri-

primam cathedram , ille præturam in curiâ
 cimum , ille in torpedinum cœtu magiste-
 rium , alter cum somniculosis gliribus , alter
 cum retrogradis cancris contubernium tibi
 designat : Quid his crabronum moribus mole-
 stius ? Quid isthac viuendi ratione calamito-
 sius ? Sentiunt enim hos stimulos miseri ve-
 cordes , sentiunt frigidum desidîæ venenum
 commoueri . Vrgentur ad cursum vndique ,
 vndique impelluntur . Hærent proinde mor-
 talium infelicissimi , nescij quò se vertant .
 Vellent vtique , atque ardentèr vellent , quod
 tamen ipsum constantissimè nolunt . Minan-
 tur se facturos , quod toties experimento edo-
 cti præuident in ventos cessurum . Noui ego
 ex hoc hominum numero quendam , quem
 iure dixerim inertîæ Heroem . Nihil hoc iu-
 uene tardius , nihil infelicius fingi poterat .
 Hic , si quando amicorum probris , atque di-
 cterijs laceffit , manum ad scribendum ad-
 mouet ; vbi incompositam librorum conge-
 riem diu multumque circumspexit ; vbi vnum
 aut alterum ex proximioribus in manus sump-
 sit ; vbi semel atramentum , seu potiùs atra-
 menti crustam , mucore scilicet contracto in
 fungos obductam , calamo pertentaui ; sudore
 fluens , anhelusque resupinat sese , & labo-
 rioso otio fatigatus vsitata desidîæ solatia au-
 cupatur . At quæ solatia ? Nempe fricare oc-
 ciput , ungues rodere , captare muscas , (illas
 tamen obuias , & ad manum) cubiculi cla-
 uos , aranearum telas , parietum foramina ,
 atque ex ijs quænam rotunda , quænam an-

gularia, scabra ne an lævia, contemplari. Præterea inimicitias nescio quas gerebat cum aurorâ atque aurâ matutinâ, adeò vt orientem solem, non dicam fenestris admittere, sed ne intueri quidem posset. Clausis oculis, obuolutoque capite in laneo quodam habitaculo delitescebat, donec illi nunciaretur Antelucanum & Matutam iampridem effugisse. Hunc tamen, aiunt, sub mensis proximè conuoluti exitum monito quodam diuinitus immisso ad laboris amorem excitatum, melioris in posterum frugis spem ostendere. Faxint superi, vt diuturno tandem conualescat morbo. Ego sanè in vrticis mallem discumbere, quàm fœdâ istâ animi scabie aliquando corripì. Quamquam etiam in me vestræ huius ignominie sordes redundant. Nam quid esse putetis, quòd domi plerunque continear, quòd cubiculi mei parietibus inclusus tegar; &, si quando precibus victus prodire cogar, frequentissimas vias declinem? Nimirum conscios hominum vultus fugio. Ipsi namque, ipsi met opifices è suis tabernis (adeò peruulgata est fama) me prætereuntem digito signant: Hic ille, inquiunt, Palladij cuiusdam cœmeterij defunctorum studiorum quæstor libitiniarius, viciatim emendicans expensas funebres pro labore mortuo sepeliendo, quem turpissima ignauia interfecit: Hic ille mortalium miserrimus, cui diligentia, alacritas, æmulatio, feruor, & cætera omnia palæstræ decora, pædore, situ, & frigore obierunt. Hæc illi. Quid vos, adolescentes? Nunquamne

resipiscendi spes vlla affulgebit ? Adhucne
 in isto cœno persistere patiemini ? Non vos
 saltem orationis huius scutica excitabit ? Egre-
 giam porrò fabulam dedistis hodie ; falsum
 enimvero epulum vestris sumptibus adorna-
 uimus . Hæc nostræ palæstræ decora aureo li-
 bro inscribemus . Hæc monimenta gloriæ in
 nostrum illud capitolium inferemus . Per vos,
 per vestram fidem , per siquid gloriæ superest
 adhuc , prohibete hoc nefas , auertite hoc pro-
 brum , hoc dedecus . Recordamini , quàm
 mihi iucundus , quàm vobis gloriosus , omni-
 busque spectabilis fuit triumphalis ille annus ,
 cùm quatuor vestro ex numero laureatos in-
 ter acclamantium voces , inter omnium ordi-
 num plausus ad erectum recens capitolium ,
 munificentissimo triumpho eueximus . Recor-
 damini tot victoriarum , atque illius præser-
 tim , cum ex debellato hoste , non vexillum
 modò , & imperatoria insignia , sed catenas
 quoque retulimus , quas adhuc , ad perenne
 gloriæ monumentum , repositas seruamus .
 Subeant præ cæteris memorabiles illæ litera-
 rijs fastis dies , quarta Kalendas Aprilis , & no-
 nâ eiusdem mensis , cùm non bini , non ter-
 ni , non duodeni , vt antea , sed centum vtrin-
 que delecti milites conflictum iniere . Quo
 plausu , quâ pompâ victores è bello reduces
 excepi ? Quæ fuit illius diei lætitia ? Quod mur-
 mur super eâ victoriâ per vniuersam urbem ?
 Quæ gratulationes Patrum ? Qui concursus in
 illam triumphalem palæstram ? Omnia erant
 prætexta lauris & floribus , omnibus in sedi-

bus defixa vexilla, omnibus è parietibus pendentia hostium spolia, atque trophæa. Adeò verò pars victa pudore exarserat, adeò viribus, animisque conciderat, ut vultus vestros ferre non posset. Nonnulli etiam audaciores reperti, qui cum calamo non possent, victores pugnis adorirentur. Fuerunt ista quondam inuictissimæ huius palæstræ decora. *Fuimus Troës, fuit Ilium & ingens gloria Dardanidum.* Conferte nunc, conferte hanc vestram abiectissimam fortunam cum illo florentissimo statu, hoc veternum cum illâ lætitiâ, hunc squalorem, hoc senium, cum illâ experrectissimâ iuuentute. O spes caducas! O fallaces cogitationes meas! Egone vnquam putassem eò rem venturam, ut coram his Patribus, olim Capitolij nostri spectatoribus, & triumphii acclamatoribus, his, inquam, coram Patribus, vos ego lutulentissimæ desidiæ reos accusarem? Quisquamne funestissimam hanc studiorum nostrorum cladem eo tempore prænuñciasset? Nihil satis cautum mortalibus. Quoties vos monui, ne victoriarum illecebris delusi quicquam de studio belli remitteretis? Quoties Annibalis & Pompej exempla ante oculos posui, quorum alter, orbe terrarum victorijs peragrato, inter theatri sui laudes, applaususque consenuit; alter inuictus alpibus, indomitus armis, Campaniæ delicijs, & tepentibus Baijs fractus emarcuit. Euenere, quæ præsciis metuebam. Quid restat, nisi ut quorum gloriam primùm ac victorias, post languorem, atque desidiâ estis imitati, eorum

rum quoque acerbissimos exitus expecteris ? At nimis vrgeo . Commoueri videntur : pal-
lent : silent : erubescunt . Bene est . Hoc erat
in votis , Operæ pretium certè tuli . Nosco ,
P.P. , meorum indolem , atque ingenia . Non
ferent hanc ignominiam , non ferent . Macti
itaque animis , Adolescentes . Non ita fracti
sumus , non ita prorsus penitusque concidi-
mus , vt nulla iam sint melioris fortunæ omi-
na . Adestis plures ex meo illo Veteranorum
exercitu , quos ex hoc loco intueor . Aderit bre-
ui , diuturno tandem recreatus morbo belli-
cosissimus Imperator , ipso etiam in nomine
bellum gerens . Fideiussores sponsoresque ha-
beo , quotquot hîc adsunt , Patres . Hi vos
meliores in dies , & frugi euasuros , vultu
oculisque pollicentur . Velitis , iubeatis P.P.
vt æmulam classem , indicto in crastinam ,
diem certamine , adoriamur , eâ lege vt
victus imperator in victorum castris cap-
tiuus maneat ? En vt animis exiliunt , vt
emicant , vt oculis annuunt , vt buccinæ
huius signo excitantur ? Sed finis sit . Nihil
inposterum timeo . At si (quod superi auer-
tant) minùs profecero ; si apud exactores
annui studij , ante tribunal Iudicum res ma-
lè cesserint ; si denique in pristinam iner-
tiam relapsos viderim ; Audite , quotquot
adestis , Adolescentes ; Audite P.P. quos me-
mores testes volo : anno insequenti in lite-
rarijs comitijs , non coram his mitissimis ,
atque humanissimis auditoribus , sed coram
sexaginta vrbis Decurionibus , & Præfecto
anno-

annonæ, quorum est aduigilare ne quis publicas fruges otiosè consumat, coram his, inquam, loco prolusionis, hanc eandem, quam audistis, hanc, inquam, ipsissimam oratiunculam, ne verbo quidem addito, aut dempto, expectate.





PROLUSIO

IN CLASSE

HUMANITATIS

HABITA.

QUod maximè formidaueram, quod tacitis votis ut longè abesset optaueram, quod cane peius & angue ode-
ram, Patres, in Helicoam veni.
En domunculas, & sparsas cellulas, quas Musæ habitant. En fontis illius fugacem surculum, quem Caballinum vocant. En denique montem illum biuerticem, quem vobis mihiq; adeundum etiam atque etiam considero. Hanc scilicet mihi gratiam retulit Aluarus, ut, post triennium apud ipsum integrâ fide, nullâque fraude exactum, nunc demum nil tale merentem veteri hospitio emiserit, eiecerit, exturbauerit; atque ad has asperrimas Parnassi radices reluctantem atque obnitentem compulerit. Quod tantum scelus in eius domo per hosce annos admiserim, participium ne aliquod imprudens læserim, an reciproci
iura

iura violauerim ; num cuiquā ex eiusdem familiā seu nomini , seu generi , seu ordinī iniurius fuerim , haud equidem scio . Id vnum scio , sub Augusti exitum mihi apertissimis verbis indictum , vt intra duos proximos menses , ex vniuersā Emmanuelis Aluari ditione pedem efferrem . Additi præterea hodie nominatim , quos mecum educerem , exilij comites , atq; hi alienis omnes suffragijs designati ; vt ne integrum quidem mihi fuerit eorum , quos potissimum mallem , arbitrato meo delectum habere . Adsum itaque , vosque vnā mecum adestis , Adolescentes , exules ac profugi ex nostris pagorum , castellorum , vrbium , oppidorum finibus . Nobis certē longē melius fuerat apud nostram illam , tametsi fastidiosam anum Grammaticam , degere , quā ad hæc salebrosa loca deuenire . At , quando factum , infectum iam reddere non possumus ; quando reditū ad antiquas sedes spes omnis intercidit , cogitandum nunc atq; inter nos decernendum quid facto opus sit , quid consilij in præsentia capiendum . Neque enim hīc sub dio , in primo Parnassi aditu , inter vepres & senticeta iuuat diutiūscunctari . Itaque in medium proferam quæ huius temporis ac loci ratio postulat , opportuna nimirum quædam monita , ne è grammaticorum provinciā eiekti , Musarum insuper finibus excludamur .

Et primò quidem in his initijs , in hac rerum omnium inopiā , omnisque suppellectilis penuriā , quod extremē indigentibus iura
finunt,

finunt, (pudet quidem) sed, quandoquidem necessitate, legum omnium experte, vndique vrgemur & premimur (humanum dico) non quidem vt apertis latrocinij in aliena inuadamus; sed tamen Intelligitis opinor; neque enim natura vngues tantummodo ad scalpendas aures, fricandamque scabiem homini dedit; sed vt aliquando in supremâ egestate, & desperatissimo rerum omnium subsidio sibi quisque consulat; quod licere omnino crediderim,

Vt, verbo furtum, de Lugo, & summa Diana: Auctoresq; alij, ne quenquam scrupulus angat; Dummodo, vt in casu nostro, penuria rerum Urgeat extrema, atque aliter succurrere vitæ Non possis; namq; hac est conditio sine qua non, Vt præceptores morum de more loquantur.

Quod tamen vt cautè ingeniosèque præstetis, ne quis demum in Senatu Apollineo de repetundis reus agatur, aliquid præmonere oportet. Est in huius regionis Emporio institor quidam ditissimus, qui omnigenas Parnassi merces, vltro citroque conuehit: animalia, flores, vrbes pictas, trochos, talos; vestes, pyxides, esculenta etiam & poculenta, quicquid demum humanæ vitæ vsibus ac delicijs inseruit. Huius optimi senis (Gandutium vocant) non rarò imperiti quidam latrunculi officinam adoriuntur, in farinâ illâ tripudiant, quicquid ad vngues venit diripiunt, expilantque; sed exitu planè infelici. Cùm enim merces illæ notissimæ sint; vt patuit furtum, statim præco ex altissimâ turri rem palam

palàm denunciat. Sempronius, verbi gratiâ, Venetæ vrbis icunculam, quæ erat ex supellectile Petri Maffei, surripuit. Caius placentam herbariam ex armariolo Vincentij Guinij clam sustulit, atq; integram deuorauit. Itaque ne cui vestrum turpissima huiusmodi macula inhæreat, ab hac frequenti nimium officinâ manus absteineat. Ex Virgilio quidem ac Cicerone, qui duo principes huius regionis viri latissimos fundos, vberimasque ditiones possident, analecta quædam sublegere, aliquid in rem vestram trahere minori offensionis periculo licebit. Verum, re meliùs inspectâ, nequis aliquando, quod facilè vsuueniret, vngues licentiùs quàm par est exerat, mutato consilio, potiùs auctor sum, vt artem aliquam, tametsi plebeiam atq; infimam, quisq; exerceat, atque inde lucellum qualecunque contrahat, quo in dies victitet, citra suspicionem omnem piaculi. Neque id difficile admodum est. Quàm latè enim patet hæc vallis, diuersis opificijs celeberrima est. Sunt qui versus ferunt, qui exacuunt, qui metiuntur. Sunt qui periodos quadrant, qui tornant, qui malè tornatas incudi reddunt. Alij intexunt, alij expoliunt, alij colorant, alij inaurant. Vobis accomodatius crediderim in præsentia centonibus conficiendis manus adijcere. Priscorum hîc tantummodo reliquiæ conquiendæ, atque in opus consuendæ. Artis labor in eo vnice est, vt aptè commissuræ celentur; foras intima, intrò extima conuertantur.

Sed aliud est longè grauius, cui remedium
ali-

aliquod præfens excogitandum . Peregrini ;
 vti videtis, atque hospites hîc sumus , huius
 idiomatis , & morum regionis ignari prorsus .
 Grammatici solem solem , nauim nauim ap-
 pellabamus . At hîc , nisi pro sole
Titana, aut Phœbū, aut radijs Hyperiona cinctū,
 & pro nauī

Castellum sulcans liquida aut Neptunia regna,
 nisi , inquam , ita dixerimus , ridebunt acco-
 læ , intelliget nemo . Quæ nos appellamus
 mendacia , isti Ironias, Allegorias, & Tropos
 vocant . Solœcismus, verbi gratia, fœdissimus
 vobis exciderit , halitu suo aptus contamina-
 re aërem . Quod nos seriâ obiurgatione ca-
 stigabamus , isti ad risum compositi , velut
 opobalsamum naribus admouendum , conti-
 nuò excipient , & miris laudibus in Cælum
 tollent . Interdum de cucurbitâ , ne integro
 quidem salis modio condiendâ , colloquentes
 audies . Quid tandem istæc erit cucurbita ?
 Innocentissimum aliquem ex istis adolescen-
 tibus sub hoc fruticis nomine designabunt .
 Vide ne te promissis ludant ; neque enim pe-
 cuniam aut cœnam, aut quid simile ; sed bo-
 na quædam immobilia, videlicet *maria & mon-
 tes* polliceri solent , quorum te deinde exac-
 torem liberalissimè constituunt . Videtis, ado-
 lescentes, quantum à nostro illo simplici can-
 didoque sermone , Parnassium istud idioma
 distet ? Nihil petatum ex triuio , nihil vsu
 tritum , nihil quod fuerit in ore vulgi , fali-
 uâ populari infectum patitur . Caue igitur ne
 quando dixeris , vti nobis mos erat , *Petrus
 emit*

emit equum . Franciscus venit Mediolanum ;
 atque huiusmodi plebeia & popularia nostrorum oppidorum . Nullus hîc Petrus , nullus Franciscus : ex familiâ Donati sunt isti homines , Prisciani contribules , pagorum & castellorum Aluari agricolæ atque oppidani . Dicendum itaq; *Scipio aut Asdrubal emit equum , seu potius in res suas transtulit cornipedem . Alexander ille Persarum domitor in Emporium Insubriæ se contulit : ite vos per singula .* Difficilia atque ardua sunt ista , equidem fateor , sed vsu paulatim emollientur . Magna est , adolescentes , vis consuetudinis . Vsu assiduo equi sessorum voces intelligunt ; Simioli quoque exercitatione diutinâ , vexilliferi & funambuli fiunt ,
Cirratique canes , ad nutum & iussa magistri ,
Defiliunt gelidas in aquas ,mersumque sub undis
Scrutantur nûmum ,deprensamq; ore , vocantem
Ad dominû referunt ;mox lati in gramine aprico
Ad solem excutiunt rorantes flumine villos .
 Nihil denique est , quod diuturna assuetudo aliquando non præstet .

Venio nunc ad omnium maximam , quam in arduo montis huius ascensu offensuri sitis , difficultatem . Attentos hîc volo , vbi rei summa vertitur . De argumentis , siue , vt aiunt , pensis domesticis loquor (libet enim , omisâ tantisper Allegoriâ , apertè & more nostro grammatico ad captum loqui) Itaque id vnum operis superioribus annis vobis incubuit , vt quæ ipse vernaculo idiomate proponerem , ea vos latinis vocibus redderetis . At quota pars
 ista

ista oneris, cui mox humeri supponendi?
Etenim tornatam sonoramque periodum, aut
volubile initium poëmatís interdum excipie-
tis, cui repentinè in medio cursu, veluti cum
equi adducto frano ex improviso sistuntur,
vel cum alicui repentinâ apoplexi correpto lo-
quela intercipitur; haud aliter currenti ora-
tionis aut carminis rotæ improvisum & cætera
subiungetur. Exemplum esto in hâc auroræ
descriptiunculâ.

*Phosphorus aurora pulsauerat ostia. Et cætera.
Dicetis excitasse illam è somno, monuisse ne
ulteriùs differret diem; sub iugo impatientes
equos, Phæbi iugalibus aduentatibus adhiinnire.*

Quid facies, Labiene, tali in re ac tempo-
re? Hic te, fodes, volo, in gerundijs nate
atque educate. Quid ais? vt te expedis? Quid
consilij capies in isto improviso carminis de-
liquio? Prosequere.

*Ille caput roseo cingebat roscida ferto,
Atque hinc Leucothoë, & cætera.*

*Describetis famulas nymphas, quæ verticem
comunt, vestes eoís balsamis afflant.*

Hic tibi iterum hæret aqua. Nihil in dic-
tionario, nihil in appendicibus pro supremâ,
implendis hisce lacunis opitulatur. Sed per-
ge; adhuc nucleus superest tibi frangendus.
*Vt tandem impulsopatuerunt cardine postes,
Comptaque puniceo sedit Tithonia curru,
Protinus Hesperio nigrum caput equore condit
Pallida nox. Et cætera.*

*Prosequimini, aliquos aduenientis aurora effec-
tus poëtice afferendo.*

Huc

Huc vsque argumentum.

*Atque hic in tenebris, & cæcâ in nocte relictus
Obuia quæque manu prensas, & sapius omnes
Frustra pertentas aditus, si fortè latentes
Extrahere, inque auras liceat traducere versus.*

His igitur versiculis extrahendis & capiundis
suos laqueos & decipulas opportuno tempore
instruemus. Sunt enim artes insidiæque in-
numerae, non secus ac genera aucupiorum,
quibus irretiuntur. Etenim, ut nonnullas obi-
ter innuam,

*Proderit interdum summi laquearia tecti
Intentis lustrare oculis; nam sapius illic
Carmina sub clavis, interque foramina cæca
Murorum nidos statuunt. Hinc, ordine longo
Suspensa, aut rimis abstrusa, ad vota vocantis
Indigitos veniunt è nigris lapsa tigillis.
Sæpe etiam calami latitant in vertice summo:
Vix tamen admotos propius minitabere morsus;
Illico desilient in crenam cuspide ima,
Quæ nigros latices ducit. Tu sedulus urge,
Atq; instâ: è calamo in chartâ traducta videbis:
Quin & odorifero interdum cum pulvere eburnis
Abdita pyxidulis habitant. Hinc sæpe videmus,
Confestim ac nares subiit pulvisculus ille,
Præsertim Phæbo supplex si obuerteris ora,
Sternutamento ter fausto erumpere versus
Cum sonitu, abstrusos prius, inclusosq; cerebro.
Frons quoq; torua iuuat rugis contracta, mineq;
Impatiensq; ira, ac demum conuitia iacta
In calamū & chartâ, transuersaque linea delens
Omnia, & à capite ad calcem conscissa papyrus.*

Ubi verò ex inopiâ atq; egestate istâ miseri-

mâ

ma tandem, si superis placuerit, aliquantulum emerferimus; tunc enim uero academias instituemus, officinas uidelicet, quibus conquiritas per annum merces, atq; elaborata opificia propalam, ut in nundinis assolet, proponamus. Serio tamen ignauos inertesq; moneo, ne putent in me vnum id oneris reiiciendum, sibi tantum memoria mandanda quæ ipse tradidero. O boni, qui hæc in animum inducitis, Non is ego sum, qui meo labore alienam foueri desidiam facile patiar; neque id à vobis loci huius ac temporis ratio deposcit, ut tantummodo celeris memoriæ, aptæque pronuntiationis specimen detis.

Hæc erant, quæ in præsens, usq; à primo Parnassi aditu, præcauere operæ pretium duxi. Alia deinde in decursu anni, ut res tulerint, admonebo. Interea horum locorum moribus atq; incolis paulatim in dies assuescite. Res nouas prorsus, ac miras vobis hæc regio offeret. Illud certè in primis incredibile, vero tamen verius; Non modo hîc vulpes, equi, & lupi (ut priscis temporibus fabulabantur) sed & flumines, & lucernæ, & scamna loquuntur. Etenim ut ab incolis audiui:

*Haud procul hinc habitat nemorum inter deuia
virgo,*

*Dicere cui nomen prohibet lex improba metri.
Hæc, gressus quacunq; tulit, (res mira) salientis,
Collibus, & ripis dat vocem, & verba loquaces
Esse iubet quercus, vocalia saxaq; reddit.*

Est etiam alia siue Dryas, siue Hamadryas, seu potius faga, Apostrophon vocant; quæ tur-

bam

bam longissimam, quanto pollet, spiritu inflans, non remotissimos modò, sed etiam à sexcentis annis mortuos alloquitur. Illo in specu, vnde sonus, & clamor perpetuò erumpit, Exclamatio latet; virgo plerunq; mœrens, atque ægra, quæ vocibus huiusmodi dolorem leuat. Matrona denique grauissima, & plerunque taciturna, quæ summo in vertice caliendum gerit, Epiphonema est: vulgo etiam dicitur *Tantæ molis* à laudatissimo quodam eiusdem carmine, *Tantæ molis erat Romanam condere gentem*. Solet nempe, longiori eloquio audito, suam proferre sententiam. Quamobrem huic nostræ prolusunculæ, cuius gratiâ vos, Patres, hucusque molestissimè detinui, atque à curis grauioribus auocaui, acclamaret illa subridens more suo:

Tantæ molis erat nugis dare talibus aures.



PROLUSIO DE LITERARIA AVARITIA

IN CLASSE HUMANITATIS

HABITA.

Quoties mecum ipse expendo, Auditores, quantum annonæ literariæ indies singulos abliguriat hæc palæstra; quoties, anno exacto, rationes in eo, ut frugi æconomi solent, atque hanc voracissimam Carybdim per otium autumnî considero; vehementer admiror, quâ fieri potuerit, ut perexiguus ijs redditibus, quos mihi tenuis admodum ingenij census suppeditat, quadriennium huc usque integrum tolerauerim. Nam, ut superiores omittam annos, illum, qui proximè conuolutus est, quanti stetisse mihi arbitramini? Audite. Viginti supra centum themata Italica, Latina ferè totidem: epigrammata sexaginta & octo: ænigmata decem: descriptiones vnde viginti: elegiolas septem (epistolas, academias, concio-

ciones, schemata, & alia non numero) hæc omnia quotidianæ vnius anni expensæ dilapidarunt. Patrimonium Varronis, & fundum mehercle Marci Tullij dispendia ista absorberent, non modò inopes prouentus meos. Ingenium certè adeò macie confectum in me sentio, vt nihil præter vappam, eiusque exuias relictum existimem: vsque adeò hirudines istæ, mihi perpetuò affixæ, quidquid in eo fuerat medullæ & viui sanguinis emulserunt. Non ita locustarum nubes, quoties Apuliæ aruis insedere, fruges, vites, arbutaque depascuntur; non ita bombyces recens exclusi diu noctuque arrodunt substrata folia è moris decerpta, vt istæ scholasticæ erucæ matutina, pomeridiana, & domestica themata, quidquid operoso cultu calamus profert, quidquid miser in dies fero, quidquid meto, quidquid festis diebus congreco, esu assiduo absumunt, glutunt, decoquunt, populantur. Nihil tantæ edacitati subducere, nihil in crastinum asseruare licet. Proh Deus immortalis! Quis vnquam paterfamiliâs eò angustiarum adducitur, vt, prandij aut cœnæ imminente horâ, cogitandum illi tum sit de olere, de pulmento, de iusculo, & fale? Id tamen mihi quotidie fere vsuuenit, simul ac importunum illud campani æris signum centum ferme conuiuas honorarios huc aduocat meis sumptibus alendos, reficiendosque. Fateor ingenuè, Patres; Cùm primùm ex solitudine Hieronymiani Parnassi, extra vrbs pomœrium positi, huc aduenissem, erat mihi supellex, vtensilia, congestum-

stunq̃ue peculium , non illud quidem homi-
nis opulenti & prædiuitis, sed quantum, par-
cè & frugi si viuerem, alendæ honestæ fami-
liæ satis superque, credideram . Papè ! paucis
exactis mensibus , regionem omnem inuasit
fames, quâ neque Saguntini, neque Samari-
rani, neque obsessi à Tito Iudæi crudeliorem
olim experti . Ad panem primò hordeaceum,
deinde ad furfuraceum , postremò ad gramen,
ad mures, ad soleas ventum est . Quæ dira
vnquam Celæno pessima Harpyiarum talia
prædixisset ! Quid memorem in hac atroci esur-
rie, rerum mearum funestam cladem, & mi-
ferrimum depeculatum ? Fuerat mihi Nauis
oneraria sub tutelâ Deiparæ Virginis, quam
multo studio instruxeram atque adornaueram .
Hanc præfatio importunissîma, instar coorti
turbinis, ipso magistratûs mei initio abfor-
buit, cuius tamen tabulata nonnulla hoc an-
no, si superis placet, è naufragio subducam .
Erat etiam insignis Cancer, is scilicet, quem
adolescentis collo. suspenderat Diuus Ignatius,
puerili terriculo puerilem culpam castigatu-
rus. Cancer hic summâ curâ & diligentîâ in
abdito penu per biennium asseruatus, vbi pri-
mum supremæ grammaticæ regimen inuii,
solenne illius diei epulum auxit inter postre-
ma fercula productus. Præterea fuerant mihi
puluerulenta quadam ac omnigena rudera,
Danaûm reliquiæ . Hinc ego singula rimans,
acque perscrutans nonnihil literariæ annonæ
per hos annos eduxi . Nunc verò adeò susde-
que versa sunt omnia, vt ultra quicquam in

rem meam erui posse desperem . Itaque huc
 vsque vixi, non fordidè quidem (nam, Deo
 auspice , nihil vitæ necessarium defuit) sed
 neque profectò splendide ; ægrè certè ærum-
 noseque . Nihil tamen per incuriam perire
 passus sum : nihil prædigè , quod ego memi-
 nerim , ad pompam & luxum proiecì : nullum
 ferculum non bis saltem in mensam redijt :
 nullam venalem vestem exposui , cuius modò
 pars extima , modò pars intima , versâ vice ,
 non viderit solem . Atqui hunc saltem annum,
 si non otiosum , at non vsquequaque incom-
 modum , curarum certè plurimarum exper-
 tem mihi pollicebar , quòd laboribus antea-
 ctis frui , & parto viuere aliquatenus arbitra-
 bar . Videte, calamitoso homini, quem semel
 fortuna deiecerit, vt pessima quæque ingruant .
 Habeo superstites in his infelicibus scamnis
 quinquaginta fere aures veteranas, testes bene-
 memores, quas nequicquam abs me diuellere
 mutatione palæstræ sum aggressus . Harum
 itaque aurium sinus hiatusque mihi molestis-
 simos nouis carminibus, nouis periodis, nouis
 ex integro scriptionibus implere cogor . In-
 terea tria iusta volumina, in quibus tum so-
 lutæ tum strictæ orationis argumenta rite
 iam digesseram , labor anni , deliciæ , & fa-
 cultatulæ meæ, erudiendo abaco cellulæ meæ
 asseruantur , nec enim ex ijs sperem tellure
 defolsis, & fimo opertis, irrigatisque, vt quon-
 dam regis Midæ tonsori, vocales inde arundi-
 nes prodituras .

Insere nunc , Melibæe , pyros, pone ordine vites .
 Sca

Scabiem potius & tussim in hoc gymnasio relictam mallet, quàm....

Sed nimium multa de nugis. Serium aliquid, Patres, expectatis. Dabo, neque longè petitem ab hac ipsâ querimoniâ, quam audistis. At credite, inter maximè seria negotium istud mihi esse, quod vobis visus sum, per iocum efferre.

Aliquis fortasse vestrûm tacitè exprobrauerit mihi nimium tenacem ac timidam in literis avaritiam. Fateor. Aio tamen hanc avaritiam apprimè vtilem & necessariam non minùs vitæ quàm literis fore. Quantò enim melius literariæ Reipublicæ consultum foret, quantò compendiosior esset facultas quæque, si literatos avarissimos habuisset, qui nil de amplificandâ voluminum mole aut copiâ solliciti, nihil scriptum transcribere, nihil coctum recoquere, nihil ex chartâ in papyrum traducere voluissent. Exigua fortasse bibliotheca mundum vniuersum literarium complecteretur. Ex hac tenacitate nimirum aurea illa breuitas manat, quam cuncti laudant, nulli consequuntur præter avaros. Breuitatis porrò hæc prima laus, vt rebus malis, si non fastidium, saltem nauseam demat; optima, verò meliora adhuc reddat. Ouidij virtutibus avaritiam admisce, nihil ex eius poësi carpere liuor possit. Hanc adime Virgilio, voluptatem omnem & charites eius diuino poëmati senties deesse. Huius præclaræ avaritiæ, quæ & quandoque labori parcere, & rebus suis opportunè vti sciat, egregium enimuerò specimen

timen dedit idem Virgilius in duabus Stygis descriptionibus, quarum alteram habet Georgicorum quarto, alteram Æneidos sexto. Georgicorum quarto, ubi Orpheum inferos adeuntem describit; hæc habet.

*Umbra ibant tennes, simulacraque luce carentū.
Quàm multa in sylvis animum se millia condunt,
Vesper ubi, aut hybernus agit de mōtibus imber,
Matres atque viri, defunctaque corpora vitā
Magnanimū heroum, pueri, innuptæq; puella,
Impositique rogis iuuenes ante ora parentum.*

En iterum Æneidos sexto eiusdem Stygis descriptio. Attendite.


*Huc omnis turba ad ripas effusa ruebat,
Matres atque viri, defunctaque corpora vitā
Magnanimū heroum, pueri, innuptæq; puella,
Impositique rogis iuuenes ante ora parentum.
Quàm multa in Sylvis, autumnī frigore primō
Lapsa cadunt folia &c.*

Quatuor fere carmina ex integro transscripta audistis. Cur hoc? nisi quòd ingenij expensis iam elaborata, & limata fuerant; neque è re suā existimauit prudens & frugalis œconomus laboriosis sumptibus alia de nouo recudere. Neque enim opus pœseos in eo situm putetis, adolescentes, vt quis apicem calami per aream papyri manu ducat; neque existimetis vnà cum atramento carmina etiam fluere. Non itaque erubuit Princeps vatum, sua iterum lectoribus apponere; neque semel id fecit. Cur igitur timeam ego meos pariter versiculos, mea themata auditoribus meis iterum ingerere, quò firmiùs adhærescant.

At

At ista (inquit aliquis) insignis pigritia est. At ista (repono ego) hominis ratione vrentis æquissima est parsimonia. Aranearum est telam nouam conficere, vbi quis veterem disiecerit, quippe quæ non illis ex cerebro, sed ex aluo deducitur. At ego amens planè sim, si quod possum resuere & paucis reficere, ex integro ordiri velim. Verùm, ne ab instituto discedam, vultis, Auditores, vt huius commendatissimæ auaritiæ luculentissimum aliud exemplum proferam, quod omnes approbaturi sitis vestris encomijs atque suffragijs? Sic puto. Attentis animis accipite. Ecquid, obsecro vos, ex hâc nostrâ prolusunculâ hucusque laude dignum existimatis? Expendite omnia: nihil prorsus, omnino nihil. At laudem certè plausumque referet postremum istud, quod addam, & paucis expediam, vt auarum decet: quod quidem in exemplum vobis propono ad commendationem literariæ auaritiæ. Ecquid porrò istud? Epiphonema omnium pulcherrimum, cui honorificè assurgere omnes iubeo; videlicet: Finis.







DISSERTATIO

IN

INSTAURATIONE
STVDIORVM

IN TEMPO HABITA.

QVI de eloquentiâ differunt, vt plerunque solent, qui ex hoc loco annum literarium aperiunt, illud tantummodo eloquentiæ genus attingere videntur, quod olim antiquo in foro, & militaribus in concionibus usurpatum, nunc ferè totum ad sacros oratores est deuolutum. Quo fit vt, cum huiusmodi actio coram multitudine paucorum sit, minùs interea afficiantur adolescentes erga ea studia, quorum sibi vsum in reliquâ ætate & minimè necessarium & parùm vtilem futurum intelligunt: cum tamen alios planè vsus longè præstantiores frequentioresque habeat ars dicendi, de quibus pauca dicere, mox aggrediar. Illud insuper animadu-

C 5

uertit,

uerti, quoties de facultate oratoriâ sermo instituitur, vt plurimum de eius necessitate, vtilitate & laudibus panegyrim institui; nihil fere vnquam attingi de pernicio, grauiſſimisque, atque innumeris malis cauendis, in quæ ars ista ad vtilitatem mortalium nata, plerumque vicio hominum trahitur. De his etiam agendum hodie, vt qui nobis informandi sunt ad eloquentiam iuuenes simul discant & quatenus eâ vti possint, & quatenus abuti non debeant. Itaque, vt videtis, de vsu ciuilibus, atque, vt ita dicam, quotidianæ eloquentiæ, & de eiusdem abusu in præsentia dissertationem potius quàm orationem pollicitus sum. Quæ duo cum & maximè necessaria reipublicæ semper existimauerim, & de utroque raro aut fere nunquam ex hoc loco dictum putem, attentos volo, simulque veniam posco, si minimè ornatè, atque ad pompam, dummodo rem conficiam, perorauero.

Et de vsu quidem occurrit primò eloquentia illa, quæ inter probos, sapientesque viros in consilijs publicis & præcipuis vrbiū magistratibus locum habet. Quâ tamen in re, cum me diutiùs immorari, ætatis & consuetudinis meæ ratio minimè ferat, illud tantummodo innuam, quod à viris grauiſſimis aliquando audiui; nimirum hîc, si vnquam aliàs, verissimum comprobari effatum illud, primum oratoris artificium esse, vt sine artificio dicere videatur. In huiusmodi siquidem congressibus, vbi coram principibus reipublicæ viris res maximæ in controuersia versan-

santur, nihil deterius, nihil ineptius ad persuadendum, quàm oratio compta, domo allata, quæ suspicionem artis vel minimam præferat, caloremque & motus habeat, ad quamdam ingenij pompam admirationemque excitandam, iam antea præparatos. Ista quidem incautæ imperitæque multitudini fucum faciunt, quæ instar cymbulæ hac illac, quolibet flante vento, conuertitur. Inter sapientes vero velle sapere, res est indignationi primùm, deinde contemptui, & risui obnoxia. Quod quidem accidisse fertur in congressu, si bene memini, Atheniensium. Cùm enim ad molitionem cuiusdam ardui operis duo præclari nominis artifices acciti coram Patribus, astitissent, eorumque alter, magnificis promissis, multa copiosè ornatèque dixisset; rogatus alter sententiam suam: At verò, inquit, quæcunque promisit iste, ego faciam. Atque huic assensus est vniuersus ordo, quod ipsa dicendi sobrietate ac moderatione fidem præ altero sibi conciliasset.

Est etiam vsus eloquentiæ singularis in conscribendis epistolis. Verùm, cùm de artificio isto clarissimi, doctissimi que viri præcepta conscripserint, atque in eo genere orationis exempla quamplurima extent, eaque luculentissima, & multiplici idiomate, nihil est, quò diutiùs vos morer.

Tertium genus superest, de quo nemo huc vsque præcepit quicquam, nemo artem ullam confecit, aut methodum tradidit: nihil autem est in omni dicendi arte tum ad negotia

gotia quævis perficienda, tum ad mortaliū conuictum & societatem seruandam magis vtile ac necessarium. Eum videlicet eloquentiæ ciuilis vsum intelligo, qui non in foro neque in curiâ versatur; sed intra priuatos parietes in quotidianis domesticisque colloquijs, quibus sæpius in diem oratoris quisque munere fungitur, persuadendo, deprecando, absterrendo, monendo, consolando, cæteraque omnia præstando, quæ oratoriâ facultate continentur. Neque verò, quòd hîc solitariâ quadam actione, vno oratore, vno itidem aut altero tantum auditore res agitur, minori idcirco opus est arte. Verum duo tantum præcipi posse existimo; alterum, vt orator nihil impium, nihil iniquum sibi proponat, de quo paulò infra dicam; alterum, vt eorum hominum, quibuscum agit, mores, indolem, atque ingenium perspectissimum habeat. Sunt enim primò ambitiosi quidam & perspicaces, quibus quò validiores euidentioresque rationes inculcaueris, eò pertinaciores in proprio sensu ac peruiaciores efficias; ob id præcipuè, quòd vim sibi inferri sentiant, ægrèque ferant rationes sibi ostendi, quas ipsi minimè inuenerint. Cum huiusmodi hominibus ita dissimulatè agendum, ita affectanda inscitia, vt ipsi met ingenio suo in ea argumenta incurrant, quæ tu videaris ignorasse, atque ab ijs tunc primum discere, quò fiet, vt eas rationes, quarum occultè tantum quædam semina iacta fuerint, illi adoptent tanquam suas, atque ideò proniori ad assensum animo arripiant;

Sunt

Sunt alij rudes atque hebetes , qui ratiocinio nullo moueri possunt, quippe qui præ crassitie ingenij vim argumentorum minimè sentiant . Hos nisi bestiarum more clamoribus, vultu , oculis , aut obiectâ aliquâ luculentâ imagine traxeris , nihil vnquam obtineas : Quâ arte vsum ferunt Menenium illum Agrippam , qui ad sedandam multitudinem , fabellam exposuit de coniuratione membrorum humani corporis in ventrem desidiosum atque inertem , quo apologo plebem aduersus Patritios concitatam in officio continuit . Sunt alij timidi atque imbecilles, quos iniecto terrore statim permoueas . Orator sacer, cùm à Matronâ nobili chyrographum alienæ famæ perniciosissimum nullis precibus impetrasset : Retine , inquit , apud te , vt libuerit . Hæc chartula nimirum egregiè vsui erit succendendæ lignorum strui , cuius flammæ æternum destinabere . Non tulit fœmina , ceteroquin pertinax , dictum minax ; quodque adhibita antea machinæ non potuerunt , pavor , & metus extorsit . Valent etiam apud quamplurimos opportuni sales , & ioci , qui interdum proluxæ orationis pondus habent . Est enim illis , vt aiunt Rhetores , vis nescioquæ imperiosissima , & cui repugnari minimè possit . Animum ab intentione rerum sæpe auertunt : aliquando etiam reficiunt , & à satietate ac fatigatione renouant ; rerum denique maximarum momenta vertunt , cùm odium iramque frequentissimè frangant . Quâ de re testimonium egregium extat in sacris annalibus .

bus. Cùm enim Perusini, legatione missâ ad Urbanum quintum, arduum nescioquid sibi concedi postularent; orator, Reipublicæ nomine, longissimam orationem exorsus est, cuius tædio Pontifex victus, cùm mirum in modum distorqueretur, vnus è legatis, ex eo fastidio infelicem exitum causæ ominatus, remedium aliquod afferre secum animo statuit. Itaque oratione tandem aliquando absolutâ, cùm Pontifex hoc ipso austerior postulata negaret, atque in suâ opinione confisteret: At enim, Sanctissime Pater, inquit ille: Hoc insuper in Reipublicæ nostræ mandatis habemus, vt, si semel audita oratio nihil profecerit, eandem tibi ex integro orator repetat, vt saltem iteratis precibus moueare. Quare iterum recita. Quo ioco delinitus Pontifex, non modò quod poscebant, sed quidquid insuper vellent vtrâque manu daturum se pollicitus est, modò ne iterum illa crambe auri-
bus ingereretur.

Innumeræ præterea sunt hominum ingenij formæ, non minores fortasse quàm corporum, quibus tamen omnibus, prout vsus tulerit, formam ipse dicendi accommodet orator, necesse est. Aliter enim persuadendus est, qui recenti adhuc vehementis doloris vel cupiditatis vulnere leuem etiam medentis tactum reformidet; aliter, qui præiudicio tantum præoccupatus accedat; aliter qui & sapiens apprimè sit, & artis optimè conscius, quâ petatur. Sed longum esset ire per singula. Illud tantum addo, in tantâ rerum & ingenio-

niorum varietate , nihil tamen esse tam arduum , nihil tam asperum , nihil tot difficultatibus oblitum , quod quidem egregius orator , si cautè se circumagere , si declinare offensiones , si opportunos aditus & tempora captare nouerit , artis suæ magisterio non possit euincere .

Hæc , atque alia plurima , quæ de usu eloquentiæ afferri possunt , videtis , auditores , nisi cum summâ probitate ac pietate oratoris coniuncta sint , quot detrimenta , quot vulnera (quæ erat pars altera orationis) tum rei priuatæ tum publicæ sint allatura . Pauca , si lubet , enumeremus . Improbi itaque eloquentis primum facinus ac scelus est , veritatem nebulis infuscare ; ita ut , si non perpetuò (nam denique luce suâ se prodit) saltem diu oppressa lateat ac fileat . Continuo labes ista in historiam manat ; atque illam rerum præteritarum custodem , normam temporum , & magistram posteritatis inficit , eique fidem omnem adimit , aut certè magnâ ex parte corrumpit . Verùm neque necesse est ad hanc corruptelam palàm impudenterque mentiri ; siquidem dissimulando , reticendo , excusando , atque , vbi veritas cupiditati fauet , tunc integrè fideliterque narrando , facillimum est rhetori versipelli , quamcunque velit faciem , coloremque , ac personam rebus gestis accommodare ; ut penes statuarium est , demptis relictisque ex marmore , quæ ex arte nouerit , humanum aut equinum caput exculpere .

Illud

Illud verò quantò etiam perniciosius, quod hanc corruptricem, & inimicam veritatis eloquentiam, etiam in Philosophiam, atque in ipsam rerum Diuinarum scientiam disertí homines intulere. Nam vitam nullam animantibus inesse, fortuito concursu omnia gigni, nec aliud esse rerum istarum vniuersitatem, quàm spatium quoddam dissectum in taxillos innumeros, deinde diuersimode turbinatum, vt ex eâ rotatione atque attritu sidera, planetæ, terrarumque orbis extiterint; an non hæc omnia, & sexcenta alia id genere elegantissimis calamis captiosa eloquentia inuexit? Quid sacras verò scientias memorem? Audeo dicere lethalius religioni vulnus intulisse Erasmus, & Molinæum, ceterasque illius temporis rhetoricas pestes, quàm ipsi tentauerint primi machinatores hæreseos, atrocissimi sceleris antesignani. Hoc iam pridem ab ipso Christianæ fidei exordio animaduenterunt Patres, hæreticorum scilicet id esse proprium, vt fœda & indecora dogmata sua verborum ornatu ac nitore vestiant; è contrario verò Catholicam Ecclesiam nudâ & simplici veritate esse contentam.

Excludor angustiam temporis, quo minùs cæteros improbi oratoris abusus persequar, quoties vel ad priuatam sui vtilitatem, vel ad explendam iram, vel ad excutiendum dominatûs iugum malignam eloquentiam conuertit. Nam quid de actione forensi dicam? Quæ causa adeò profligata est, quam si disertus, idemque iniquus orator eloquentiam suâ tra-

tractare velît, non possit incautos iudices ad se trahere, atque ad suffragia contra omneius cogere? Quid dicam de adornandis calumnijs? quid de maledicentiâ? De hâc porrò, utpote quæ familiarium sermonum condimentum frequentissimum est, pauca attingam.

Et primò maledicentia quædam est rudis, & tyruncula, nondum exercitata, nondum expolita, quæ scilicet crassis apertisque mendacijs, ipso oculorum visu mox refellendis, alicuius famæ insidiatur. Sed ista plus clamoris habet, quàm vulneris. Illa profectò perniciosior, quæ sobria, eruditior, & castigatiorescintillulam quidem iracundiæ, nec veneni latentis halitum vel tenuissimum præfert; facie blandâ, atque, ubi res tulerit, falsi amoris & beneuolentiæ plenâ. Hæc prauum aliquid (quid enim facilius?) in vitâ alicuius certò subodorata, aut nacta, non muliercularum more plebeijs contumelijs insultat; sed illud vnum curat, ut rem frigido ore augeat, incendatque, aprissimâque incuriâ fidem faciat. Illa verò atrocissima, & magisterij apicem planè adepta, quæ miserorum famæ palam proscissæ & dilaniatæ miserationem omnem adimere studet. Quamobrem, in eo tota est, ut detecta alicuius vitia publicæ irrisioni exponat: neque sepeliri illud cadauer famæ patitur, sed nigro sale conditum gaudet versari quotidie ante oculos, ante ora omnium, spectaculum miserrimæ voluptatis.

Proh Superi immortales! Quam fatiùs esset
carere

carere omni arte eloquentiæ, quàm eadem in mutuum perniciem tam noxiè frequenterque abuti? Quanquam nullâ arte, ut est apud nescio quem veterem præceptorem, nullius, inquam, artis studio eget maledicentia; Nescioquâ malignitate nobis ingenitâ nascimur rhetores, ut nisi quis perpetuò effrenem istam cupiditatem coërceat, perexiguo tempore & breuissimâ exercitatione nocendi artifex peritissimus euadat. Nouerat ista egregius ille institutor Fabius Quintilianus: quamobrem in ipso aditu institutionum suarum illud in primis exigit, ut orator sit spectatæ indolis, ac probitatis. Quid enim, ut inquit ille, nocentius eloquentiâ illâ, quæ pœnis eripiat sceleratos, cuius fraude damnentur interim boni, consilia ducantur in peius, nec seditiones modò, turbeque populares, sed bella etiam inexpiabilia excitentur? Deinde affert exempla Græcorum, Romanorumque, & enumerat, qui perniciosâ non singulis tantum, sed rebus etiam publicis vsi eloquentiâ turbauerint ciuitatum status, vel euerterint: eoque & Lacædæmoniorum ciuitate expulsum, & Athenis quoque, ubi actor mouere affectus verabatur, velut recisam dicendi potestatem. Contra verò quid Reipublicæ probo ac sapiente oratore contingere felicius potest, qui equitatem in iudicijs, innocentiam aduersus calumniatores, oppressos aduersus potentiores interritus tueatur? quem nec cupiditas corumpat, nec gratia auertat, nec metus frangat: qui leges incolumes seruari velit, erum-

nis;


nis priuatis ac publicis mederi possit, solari afflictos, corruptos mores obiurgare, scelera absterre. Quid si deinde huic equitati nature atque indolis Christianam pietatem adiunxeris? Quid si huic insuper canities senectutis, splendor natalium, auctoritas magistratus accesserit? Hunc virum quis non Diuinâ quadam beneuolentiâ & Superum dono concessum Patrię existimabit? Hic ille erit discordiarum omnium arbiter, & conciliator; pupillorum, derelictorumque tutor ac parens; pauperum atque erumnosorum omnium commune perfugium. Huius fores perpetuo accessu gentium obsesse, referte aule, plena atria. Huic commisse prouincię, mandate legationes, innixa respublica. Hunc denique cumulatissimi, sanctissimi que ciuis officio functum atque è viuis ereptum, hunc, inquam, lugebit patria lacrymis veris. Huius funus, huius tumulum, huius nomen, perpetuis laudibus ac preconijs posteritas prosequetur. Possem eiusmodi enumerare quamplurimos, quos Patria hæc nostra singulis ætatibus tulit: possem etiam recensere viuentes, atque ex hoc loco indicare: sed longius orationem prouherem, quam destinaui.

Ad hoc dignitatis culmen, ad hoc glorię fastigium enitendum est, adolescentes. Quod ne putetis vos assecuturos bienni studio Rhetoricę, ætate adhuc acerbâ, & moribus nondum formatis. Rudimenta ista sunt, quibus accedat oportet iugis & continua mentis intentio, iuris gentium cognitio, omnigenę historia.

storiæ lectio ; solidæque Philosophiæ informatio . Alia insuper (veniam date) instituenta domi educatio . Iste ornatus muliebris vestium auro argentoque fulgentium ; otia villarum crebra , ac diuturna ; blanditiæ , myrothecia , cincinnati , maternæque illæ commiserationes pauoresque , ne puer studio palleat , ne miser gracilescat , ne febriculam contrahat ; huius denique cui institutio à moribus antiquis atque aorum nostrorum austeritate prorsus degener , atque aliena , quæ possit adolescentum ingenia ad frugem sapientiæ perducere . Deferenda deinde ad tempus aliquod Patria , perlustrandæ nationes extere , cognoscendi mores populorum , regimina urbium varia , atque indoles gentium . Hæc animum erudiunt , hæc facundiam exerunt , hæc linguam expediunt , hæc artis præcepta instillant , quæ non satis otiosa in scholis exercitatio tradiderit : Hæc denique vos sensim ad illam eloquentiam civilem perducent , cuius multiplicem usum qui rectè tenuerit , abusumque omnem , seruata morum integritate , vitauerit , optimus & præstantissimus civis efficiatur .



F I N I S .



Wie u i l e
maior



